

蜀

鑑

第伍冊

蜀

蜀鑑卷第七

唐明皇幸蜀

唐玄宗天寶十五載帝出奔蜀

安祿山反哥舒翰敗績賊遂入關楊國
忠首倡幸蜀之策上然之乃御樓下制
云欲親征聞者皆莫之信既夕命陳玄
禮整比六軍厚賜錢帛選閑廐馬九百
餘疋黎明上獨與貴妃姊妹皇子妃主

皇孫楊國忠常見素魏方進陳玄禮及
親近宦官宮人出延秋門妃主皇孫之
在外者皆委之而去

次于馬嵬楊國忠及貴妃楊氏伏誅

帝發馬嵬留太子東討賊

馬嵬驛在興平二十二里

帝至扶風

上至扶風士卒流言不遜會成都貢春

綿十餘萬疋至上命陳之於庭召將士
諭之曰朕衰老託任非人卿等從朕倉
卒不得別父母妻子遠涉至此勞苦至
矣朕甚愧之蜀路阻長郡縣褊小人馬
衆多或不能供今聽卿等各還家朕獨
與子孫中宮前行入蜀亦自足達衆皆
哭曰臣等以死從陛下不敢有二扶風
改為鳳翔郡

蜀鑑卷十一
帝至散關

分扈從將士為六軍使潁王璩先行詣
劍南壽王瑁等分六軍以次之

帝至河池郡

劍南節度使崔圓奉表迎車駕具陳蜀
土豐稔

帝至普安房瑄謁見以瑄同平章事
普安今隆慶府

太子即位於靈武上皇至成都

江淮奏請貢獻之蜀之靈武者皆自襄
陽取上津路抵扶風

至德二載上遣太子太師常璩入蜀奉
迎上皇

冬十月上皇發蜀郡

上皇至鳳翔

上皇命悉以甲兵輸郡庫上發精騎三千

奉迎

十二月丙午上皇至咸陽

論曰蜀叢爾一隅耳漢高帝以布衣特起項羽王之漢中焚絕棧道示無還意矣徘徊南鄭鬱鬱不歆久居明皇以英武之姿廼沈溺宴安召禍致寇不復堅守京師狼狽奔蜀使非李郭諸人輔肅宗以歸關中唐之宗社亦岌岌矣哉厥

後德宗至興元而遽反中和之駕留蜀者三年朱溫遂以篡唐唐人謂神堯以一旅取天下而後世不能以天下取河北夫豈知河北之失又基於明皇之弃京師而走蜀歟

高宗文討劉闢

順宗永正元年劔南西川支度副使劉闢自為留後

節度使常臯薨關久佐臯幕自為留後使諸將表求節鉞朝廷不許以袁滋為西川節度使徵關為給事中關不受徵阻兵自守袁滋畏其強不敢進上怒貶滋吉州刺史以關為西川節度副使知節度事憲宗以初嗣位未能討也諫議大夫常丹上疏以為釋關不誅則朝廷可以指臂而使者惟兩京耳此外誰不

為叛上善其言以丹為東川節度使關既得旌節志益驕求兼領三川上不許劉闢圍東川節度使李康於梓州

憲宗元和元年以神策軍使高崇文將前軍兵馬李元弈將次軍山南西道節度使嚴礪討闢高崇文出斜谷李元弈出駱谷上欲討闢而重於用兵公卿議者亦以為蜀險固難取杜黃裳獨曰闢狂慝書

生取之如拾芥耳臣知神策軍將高崇文勇略可用願陛下專以軍事委之勿置監軍關必可擒廼命高崇文將五千李元弈將二千與嚴礪同討關高崇文屯長武城練卒五千常如寇至卯時受詔辰時即行器械糗糧一無所闕崇文軍至興元軍士有折人人筋者崇文斬之以徇

劉闢陷梓州執李康嚴礪拔劍州斬其刺
史文德昭

闢據劍閣以抗王師

高崇文入屯梓州斬李康以崇文為東川節度使

崇文引兵自閬州趣梓州闢歸李康於崇文以求自雪崇文以康敗軍失守斬之嚴礪奏克梓州制削奪關官爵韋丹

至漢中表言崇文客軍遠鬪無所資若
與梓州綴其士心必能有功以崇文為
東川節度使

劉闢城鹿頭關高崇文擊敗之又破闢於
漢州嚴礪將嚴秦破闢衆萬餘人於石碑
谷

關城鹿頭關連八柵屯兵萬餘人以拒
崇文崇文擊敗之闢置柵於關東萬勝
堆崇文遣將高霞寓攻奪之崇文又破
闢於德陽又破之於漢州嚴秦破闢衆
萬餘人於綿州石碑谷○鹿頭關在漢
州德陽縣萬勝堆未詳

高崇文破劉闢衆萬人於玄武
詔凡西川繼援之兵悉取崇文處分○
玄武今潼川府中江縣

高崇文又敗劉闢於鹿頭關嚴秦敗劉闢

之衆於神泉

於是關綿江柵將李文悅鹿頭守將仇良輔皆以城降於崇文士卒降者萬計高宗文克成都擒關檻送京師伏誅

崇文直指成都克之劉闢西奔吐蕃崇文使高霞寓等追之及於羊灌田關赴江不死擒之盧文若先殺妻子乃繫石自沈檻送京師斬之

以高宗文為西川節度使嚴礪為東川節度使

杜黃裳建議征蜀及指授高宗文方略皆合事宜於是始用兵討蜀以至威行兩河皆黃裳啓之也

論曰○河北連衡旅拒朝命地險勢強誠未易支也區區之蜀豈得與之為比唐都關中蜀近在戶限之外徒以正元

姑息吐蕃陸梁常臯得以久任者二十
餘年劉闢一狂生遽欲踵臯之轍自為
留後此而不討何以為國憲宗任杜黃
裳為相天誅一加而威行兩河備哉

唐僖宗幸蜀

唐僖宗廣明元年黃巢入長安上走興元
黃巢趣長安既入城田令孜帥神策兵
五百奉帝自金光門出惟福穆澤壽四

王及妃嬪數人從行百官皆莫之知晡
時賊前鋒入長安金吾將軍張直方帥
文武數十人迎於霸上上趣駱谷鳳翔
節度使鄭畋謁於道次請留鳳翔上曰
朕不欲密邇巨寇且幸興元徵兵以圖
救復卿可糾合鄰道勉建大勳上至壻
水詔陳敬瑄諭以京城不守且幸興元
若賊勢猶盛將幸成都宜豫為備擬

帝至興元諸諸道出兵收復京師
中和元年春正月發興元至成都

陳敬瑄迎謁於鹿頭關至綿州東川節
度使楊師立謁見鄭畋遣其子凝績詣
行在凝績追及上於漢州車駕至成都
館於府舍

鄭畋傳檄天下合兵討賊

時天子在蜀詔令不通天下謂朝廷不
能復振及得畋檄爭發兵應之

西川黃頭軍作亂討平之

黃頭軍使郭琪帥所部作亂命諸軍擊
之琪夜突圍出奔廣陵

殺左拾遺孟昭圖

田令孜用事昭圖上言曰天下者高祖
太宗之天下非北司之天下天子者四
海九州之天子非北司之天子北司未

必盡可信南司未必盡無用疏入令攷
屏不奏矯詔貶昭圖嘉州司方遣人沈
於墓願津聞者氣塞而莫敢言○墓願
津在眉州眉山縣

中和二年邛州牙官阡能作亂押牙高仁
厚討平之

陳敬瑄鎮西川多遣人歷縣鎮訶事謂
之尋事多所求取有二人過資陽鎮獨

無所求鎮將謝弘讓邀之不至自疑有
罪夜亡入群盜中而實無罪也捕盜使
楊遷誘而執之以求功敬瑄不之問釘
於西城煎油澁之備極慘酷邛州牙官
阡能因公事違期亡命遷復誘之能方
出首聞弘讓之冤發憤為盜踰月衆至
萬人州縣不能制敬瑄遣楊行遷將兵
數千人討之官軍與戰不利恐獲罪多

執村民為俘日十數百人敬瑄不問悉
斬之其中亦有老弱婦人或問之皆曰
我方治田績蘇官軍忽入村係虜以來
竟不知何罪蜀人羅渾擊句胡僧羅夫
子韓求皆聚眾以應 能入蜀州境

陳敬瑄以押牙高仁厚為都招討指揮
使往伐之未發前一日執阡能之謀者
仁厚溫言問之皆曰某村民阡能囚某
父母妻子而曰汝詞事得實則免汝家
不然皆死某非願爾也仁厚曰誠如是
我何忍殺汝汝歸但語阡能云高尚書
來日發所將止五百人無多兵也然我
活汝一家汝為我潛語寨中人云僕射
閔汝曹皆良人為賊所制使尚書求汝
汝若投兵迎降當書汝背為歸順字遣
汝復舊業所歆誅者阡能等五人耳謀

曰此皆百姓心上事尚書盡知而赦之其誰不聽命遂遣之明日引兵發至雙流周視槩柵怒曰重復牢密如此宜其可以安眠飽食養寇邀功將斬之監軍力救僅免命悉平槩柵賊伏兵千人於野橋箐以邀官軍仁厚調知之引兵圍之下令勿殺遣人釋戎服入賊中告諭賊大喜爭投兵請降仁厚悉撫喻曰書

其背使歸寨中餘衆爭出降渾擎走其衆執之以來仁厚謂降者不款即遣汝歸為前途諸寨未知吾心或有憂疑藉汝曹為我前行過諸寨示以背字告諭之乃取渾擎旗倒擊之每五十人授以一旗使前走曰羅渾擎已擒大軍行至汝曹速如我也出降立得為良人無事矣至穿口新津延貢寨中皆爭出降執

勾胡僧斬韓求羅夫子奔阡能寨與之
謀悉衆決戰未定執旗先驅者至能歆
出兵衆皆不應明日諸寨呼譟爭出羅
夫子自到衆挈其首縛阡能驅之前迎
官軍見仁厚擁馬首大呼泣拜曰百姓
負冤日久無所控訴謀者還百姓引領
度頃刻如暮年今遇尚書如出九泉睹
白日已死而復生矣賊寨在他所者分

遣諸將往降之仁厚出軍九六日五賊
悉平敬瑄梟二首於市釘阡能羅渾擊
句胡僧而馮之阡能孔目官張榮屢舉
進士不中第歸於能為之謀主仁厚送
府釘於馬市自餘不戮一人敬瑄榜邛
州賊黨皆釋不問未幾邛州刺史申捕
獲阡能叔父行全家請準法敬瑄以問
孔目官唐溪對曰公已榜勿問而刺史

復捕之此必有故今若殺之豈非使明
公失大信竊恐阡能之黨紛紛復起矣
敬瑄從之因問其故果行全有良田刺
史欲買之不與故陷之耳敬瑄召刺史
特按之刺史以憂死他日行全密餉溪
金百兩溪怒曰此乃太師仁明何預吾
事汝乃懷禍相餉乎還其金斥逐使去
胡氏曰唐溪明足以昭姦智足以守信
廉足以提身若使處敬瑄之位阡能韓
秀昇楊師立之禍無自起矣由是觀之
自古衰世人才之易地者豈特一唐溪
哉經世之人所以汲汲於求賢惟恐不
聞良有以也

涪州刺史韓秀昇反高仁厚討平之

涪州刺史韓秀昇等聚衆寇江淮貢賦
斷絕雲安涪井踞不通之鹽敬瑄乃奏

以高仁厚為行軍司馬將兵三千以討
平之○雲安今隸夔州涪井今長寧軍
中和四年東川節度使楊師立舉兵反詔
以高仁厚為留後將兵討平之以仁厚
為東川節度使

高仁厚之討韓秀昇也陳敬瑄語之曰
成功而還當以東川相賞師立聞之怒
舉兵反詔仁厚討之仁厚屯德陽師立

遣其將鄭君雄據鹿頭以拒之堅壁不
出仁厚列寨圍之夜二鼓君雄等出勁
兵掩擊城北圍副史楊茂言不能禦帥
衆走諸寨聞之皆走茂言走至張杷追
反之詰旦仁厚斬以徇仁厚圍梓州久
不下乃為書射城中道其將士曰仁厚
不忍城中玉石焚為諸君緩師十日使
諸君自成其功數日鄭君雄斬師立出

降詔以仁厚為東川節度使○張杞在
潼川府

光啓元年車駕發成都三月至京師

光啓二年陳敬瑄殺東川節度使高仁厚
敬瑄疑仁厚欲去之會遂州刺史鄭君
立起兵陷成都敬瑄遣其將李順之逆
戰君立敗死敬瑄又發維茂羌軍擊仁
厚殺之○司馬公考異云張 耆舊傳

不言仁厚所終惟數敬瑄六錯云太師
殺高仁厚一錯高僕射權謀智勇累有
大功於太師極忠孝使在王司徒不過
梓潼司徒謂王建也

論曰僖宗之幸蜀歷三年之久而叛者
亦三起非一高仁厚為之掃平則雖區
區之蜀不容以一朝居也愚觀仁厚忠
誠智略雖古名將何以加諸嗚呼世運

雖衰而天之生才也未嘗乏當僖宗之
時有鄭畋以為相有仁厚以為將使二
子得伸其志而敬瑄令致不遂其姦則
唐宗未至於不可支也觀仁厚之平阡
能等吐露心腹於蚩蚩之氓而至於不
戮一人亦可謂忠厚之至矣議者謂蜀
民喜亂不為過乎彼唐溪邛州一孔目
官耳其明智與無為後世君子之所樂
道而高仁厚之忠厚卓卓如此宋景文
公乃略其事謂其不可與事天子惜夫

王建據蜀

唐僖宗光啓三年利州刺史王建襲據閬
州

山南節度使楊守亮忌王建驍勇屢召
之建懼不往周庠說建曰唐祚將終立
大功者非公而誰然葭萌四戰之地難

蜀鑑卷十一
以久安閬州地僻人富刺史楊茂實不
修職貢若表其罪興兵討之可一戰而
擒也建從之召募溪洞酋豪有衆八千
沿嘉陵江而下襲閬州逐茂實自稱防
禦使軍勢益盛

王建攻成都克退保漢州

西川陳敬瑄懼王建與東川顧彥朗合
謀圖已田令孜曰建吾子也今折簡召

之可致麾下遣使召之建大喜帥精騎
至鹿頭關敬瑄悔遣人止之建怒破關
兩進敗漢州刺史張瑣於綿遂拔漢州
進軍學射山又敗西川將勾惟立於蠶
此又拔德陽顧彥朗以其弟彥暉為漢
州刺史發兵助建急攻成都三日不克
而退還屯漢州○學射山在成都蠶蠶此
屬新繁縣

文德元年王建攻彭川陳敬瑄救之乃去
以常昭度為西川節度使兼兩川招撫使
王建表請討陳敬瑄以贖罪因求邛州
顧彥朗亦請赦建罪移敬瑄它鎮以請
兩川上素惡田令孜憤藩鎮跋扈會得
彥朗建表以令孜所恃者敬瑄耳以常
昭度鎮西川楊守亮副之王建軍新都
綿竹土豪何義陽安仁費師勳等擁兵

自保皆附於建

以王建為永平軍節度使治邛州

割邛蜀黎雅置永平軍以建為節度使
削奪陳敬瑄官爵

昭宗大順元年王建攻邛州拔之

簡資嘉戎四州皆降又取蜀州

大順二年詔顧彥朗王建罷兵王建逐常
昭度還攻成都周庠勸建請常公還朝

獨攻成都克而有之建從之嚮其親吏
昭度大懼以印節授建即日東還建送
之出劔門即以兵守之不復內東軍急
攻成都環城烽塹一百五十里

王建克成都自稱西川留後以王建為西
川節度使

田令孜以印節詣建陳敬瑄開門納之
建遂自稱成都留後徙敬瑄居新津以

縣租賦給之

景德元年王建圍彭州

陳敬瑄以其將楊晟守彭州王建圍彭
踰年久不下民皆竄匿山谷諸寨日出
俘掠有軍士王先成者新津人本書生
也世亂為兵度諸將惟王崇侃最賢往
說之曰彭州本西川之巡屬也陳田以
授楊晟使拒朝命今陳田已平而晟猶

據之州民皆知西川大府而司徒其主也故大軍始至民不入山谷以俟招安今軍士掠之而司徒不恤彼將更思揚氏矣宗侃惻然不覺屢移其牀前向之先成曰又有甚於此者今諸寨旦出洶虜薄暮乃返曾無守備之意城中萬一有智者為之畫策伏兵門內俟陶虜者稍遠使出奮擊又於三面城下各出耀

兵諸寨咸自備禦無暇於救能無敗乎宗侃矍然曰此誠有之將若之何先成請條例為狀以白王建凡七條一乞招安山中百姓二乞禁諸寨洶虜三乞招安寨選部將謹幹者執兵巡衛四乞招安之事願帖守侃專掌五乞悉索所虜彭州百姓集於營場有父子兄弟夫婦自相認者即便從送招安寨敢匿者斬

六乞置九隴行縣於招安寨中撫理百
百姓給牒入山招其親戚七乞彭土宜
麻民未入山多漚藏者宜令縣令曉諭
各歸田里出而鬻之以為資糧必漸復
業建得之大喜即行之三日民出山赴
寨如歸市久之見村落無抄暴稍辭縣
令復其故業月餘招安寨皆空
胡氏曰古人所以廣取士之跡者為賢

才難知恐其遺也取之廣然後賢才不
在下而皆在上則下受其賜而亂無自
起矣王先成走卒也王建得之遂不用
兵而下一州然則人才之隱伏於塵土
草茅可勝計哉是宜表而用之俾盡見
其所長而建不能宜所統之狹劣也
論曰昔先正呂汲公之敘華陽國志也
其言曰自先漢至晉初踰四百歲士女

可書者四百人可謂衆矣復自晉初至千周顯德僅七百歲而史所書無幾人忠魂義骨與遊塵野馬同沒於丘原者多矣觀唐溪邛州一孔目官王先成慙一軍士而致堂胡氏拳拳予而進之也如此蜀之人才遺逸之久如汲公之言真可惜也

鳳翔節度使李茂真取興元楊守亮奔閬州

宦者楊復恭奔興元與山南節度使楊守亮拒王命茂真討之遂取興元守亮等奔閬州茂真表其子繼密知興元府事遂有曠之地

王建遣兵擊楊守亮於閬州破之大順二年王建殺陳敬瑄田令孜建請於朝不許遂殺之

乾寧元年王建克彭州殺楊晟

建克彭州楊晟猶帥衆力戰于都虞候王茂權斬之獲其馬步使安師建建欲使為將師建泣謝曰誓與楊司徒同生死不忍復戴日月再三諭之不從乃殺之禮葬而祭之○晟今有廟在彭州後圃

乾寧三年荆南將許存降于王建更名宗

播

荆南節度使成汭遣存泝江略地以存為萬州刺史存遂降於建

乾寧四年王建遣王宗侃攻渝州王宗阮攻瀘州取之

宗侃取渝州降刺史牟宗厚宗阮拔瀘州斬刺史馬敬儒峽路通

王建遣華洪攻東川王宗謹敗鳳翔將李

繼徽等於玄武

顧彥暉代其兄彥朗為節度使楊守亮嘗攻之求救於王建建嘗遣華洪救彥暉因而執之彥暉覺其謀至是彭州既平建乃謀東川○玄武今中江縣

鳳翔將李繼昭救東川留偏將守劔門王宗播擊擒之

王建自將攻東川克之顧彥暉自殺

以張琳守成都更華洪姓名曰王崇滌朝廷遣使和解兩川遇建於張杷寨建指執旗者曰戰士之情不可奪也建與彥暉五十餘戰遂圍梓州用蜀州刺史周德權策遣使諭以外無救援彥暉勢益孤知遂州侯紹知合州王仁威鳳翔將李繼溥皆以援兵降於王建建攻益急彥暉自殺城兵尚七萬人命王宗綰

分兵徇昌普等州以王宗滌為東川留
後○彥暉兄弟有廟在潼川府子城論
曰王建以盜賊之質乘陳敬瑄田令致
斗筲竊之時遂假王命以逐元帥楊晟
顧彥暉獨撓其鋒以死拒之然晟蓋敬
瑄之黨而彥暉亦歎為建者非果忠於
唐也以區區之蜀連兵蹀血數年乃定
其禍也也慘矣二州之人尸而祝之不

亦異乎

天復二年王建取利州

西川兵至利州李繼忠奔鎮奔鳳翔王
建以王宗偉守之

王建取興元

西川軍至興元李繼密戍三泉以拒之
王宗播遂破金牛黑水西縣褒城西寨
王宗綰破馬盤寨繼密戰敗奔還漢中

西川軍遂乘勝至城下王宗滌帥衆先
登遂克之繼密請降遷于成都得兵三
萬騎五千詔以王宗滌鎮之宗滌有勇
略得衆心王建忌之遂殺之以王宗賀
權興元留後○三泉今大安軍金牛黑
水西縣褒城馬盤並在今興元府

王建取洋州興州

李思敬以洋州降于建建攻後興州以

王宗浩為興州刺史

天復三年王建出攻秦隴判官韋莊入貢
建亦修好於朱全忠全忠遣押牙王殷
報聘殷言蜀甲兵誠多但乏馬耳建作
色曰當道江山險阻騎兵無所施然馬
亦不乏乃集諸州馬大閱於星宿山官
馬八千私馬四千部隊甚整殷嘆服建
本騎將故得蜀之後於文維黎茂州市

胡馬十年之間遂及茲數

進王建爵蜀王

王建取夔忠萬施四州屯軍夔州

王宗本兵至夔州刺史侯矩以城降宗

本遂定夔忠施四州建復以矩為夔州

刺史更姓名曰王宗矩蜀之議者以瞿

唐蜀之險要乃奔歸峽屯軍夔州○王

建自光啓二年丁未據閬州反至天復

三年癸亥凡十七年然後取夔門盡有

蜀地

天祐元年王建遣兵迎車駕

朱全忠劫上幸洛陽上遣間使以御札

告難于王建建遣王宗祐將兵會鳳翔

至興平遇汴兵不得進建始自用墨制

除官

五月趙康凝攻夔州不克

康凝鎮荆南遣水軍上峽攻夔州知渝
州王宗阮擊敗之萬州刺史張武作鐵
絙絕江中流立柵於兩端謂之鎖峽

王建與鳳翔李茂貞連和合兵討朱全忠
馮涓言於建曰梁唐虎爭勢不兩立若
併而為一舉兵得蜀雖諸葛復生不能
敵矣鳳翔蜀之藩籬不若與之和親無
事則務農訓兵有事則觀釁而動可以
萬全建曰善乃與茂貞修好

天祐二年王建取金州馮行襲復取之行
襲奏金州荒殘乞徙理均州從之後數
年桑弘志又克之

天祐四年王建稱帝

岐蜀交爭

蜀永平元年岐攻興元唐道勳擊却之
梁以僭號唐已亡矣今係以蜀

岐王使劉知俊李繼崇將兵擊蜀王宗侃等與戰於青泥領蜀兵大敗王宗浩奔興州道襲奔興元先是王宗綰城西縣號安遠軍宗侃宗賀等收散兵走保之知俊繼崇追圍之衆議欲奔興元道襲曰無興元則無安遠利州遂為敵境矣吾必以死守之王宗播將兵救安遠軍壁於廉讓之間與唐道襲合擊岐兵大

破之於明珠曲明日又戰於鳧口斬其成州刺史李彥琛○青泥領在沔州長舉縣西縣屬興元王建置安遠軍廉讓二水名南齊梁州記范栢年因出謁宋明帝言及廣州貪泉因謂曰卿州復有此否荅曰梁州惟有文川武鄉廉泉讓水曰卿宅何在曰在廉讓間明珠曲未詳鳧口鳧谷水口也在今興元府廉水

縣

蜀主自將擊岐兵大破之

蜀主入利州命彭君集破岐二寨王宗侃在安遠遣人自中巴間行至泥溪見蜀主告急蜀主命王宗弼救安遠宗弼及劉知俊戰於斜谷破之宗弼敗岐兵於金牛拔十六寨俘斬六千餘級王宗播敗岐兵於黃牛川蜀主自利州如興

元安遠軍望其旗王宗侃等鼓譟而出與援軍夾攻岐兵大破之拔二十一寨岐兵解圍遁去○金牛屬大安軍黃牛川在南鄭縣黃牛山下中巴在今巴州泥溪在利州西南今米倉山間道也蜀永平二年王宗汾攻岐文州拔之

永平四年蜀攻岐階州破長城關

永平五年蜀遣兵岐岐克階成秦鳳州

蜀遣王宗播攻秦州王宗瑤攻鳳州王宗翰引兵出青泥領克固鎮興秦州將郭守謙戰於泥陽川蜀兵敗退保鹿臺山王宗綰等敗秦州兵於金沙谷乘勝趣秦州王宗鐸克階州王宗綰克成州蜀軍至上染坊秦州節度使李繼崇奉牌印迎降王宗綰自河池兩當會王宗瑤攻鳳州克之○泥陽水北出泥谷上染坊屬天水在阜郊堡南

通正元年蜀攻岐圍鳳翔

王宗綰舉軍出大散關大破岐兵俘斬萬計遂取寶雞王宗播等出故關至隴州李繼安奔隴州奔于蜀軍蜀軍進攻隴州會大雪蜀主召軍還○故關在隴州隴安縣

先天元年蜀主建殂太子宗衍立

蜀鑑卷一
高季昌攻蜀夔州

蜀王建永平四年荆南高季昌攻夔州不克

高季昌以蜀夔萬忠涪四州舊隸荆南興兵取之先以水軍攻夔州刺史王成先逆戰季昌縱火船焚蜀浮橋招討副使張武舉鐵絙拒之船不得進會風反荆南兵焚溺死者甚衆季昌乘戰艦蒙以牛革飛石中之折其尾季昌易小舟以遁荆南兵大敗俘斬五千級

後唐取蜀

後唐莊宗同光三年唐遣魏王繼岌及郭崇韜伐蜀李紹宗攻蜀威武城克之郭崇韜入散關

紹琛攻蜀威武城指揮使唐彥思等降得城中糧二十萬斛紹琛縱其敗兵萬

餘人逸去因倍道趣鳳州李巖飛書以
諭王承捷李繼暉竭鳳翔蓄積以饋軍
不能克人情憂恐郭崇韜入散關指其
山曰吾輩進無成功不復得還此矣今
饋運將竭宜先取鳳州因其糧乃倍道
而進

王承捷以鳳興文扶四州降
得兵八千糧四十萬斛以承捷攝武興

節度使

蜀主王衍東遊至利州遣王崇勳等將兵
逆戰李紹琛等戰于三泉大破之

蜀主至利州遇威武敗卒始信唐兵之
來乃以王崇勳等為三招討將兵三萬
人逆戰兵皆怨憤曰龍武軍糧賜倍於
他軍他軍安能禦敵紹琛等克興州與
戰三泉大敗之又得糧十五萬斛

蜀主王衍西走斷桔柏津命王宗弼守利州

李紹琛趣利州魏王繼岌至興州宋光祿及諸城鎮皆降

蜀武德留後宋光祿以梓綿劍龍普五州王承肇以洋蓬壁三州王崇威以梁開通渠麟五州階州刺史王承岳以城降自餘城鎮皆望風款附

安重霸以秦隴降王承休自文扶歸成都王承休與安重霸在秦隴謀掩擊唐軍重霸曰擊之不勝則大事去矣蜀天下險固唐兵雖勇安能直度劔門邪然公受國恩聞難不可不赴願與公俱西承休以為然重霸請賂羌人買文扶州路以歸承休使重霸將龍武軍及所募兵萬二千人以從將行州人餞於城外承

休上道重霸拜於馬前曰國家竭力以
得秦隴若從開府還朝誰當守之開府
行矣重霸請為公留守承休無如之何
遂與招討副使王宗訥自文扶西南還
蜀其地皆不毛羗人抄之且戰且行士
卒凍餒北至茂州餘衆二千而已重霸
遂以秦隴來降○寰宇記廢扶州在文
州曲水縣今為鎮文州西至扶州鎮審
界一百三十五里舊屬隴西道松州都
督松州北至扶州三百里至吐蕃界五
十五里南至茂州三百里

高季興將水軍上峽取施州尋遁去夔
忠萬三州遣使詣魏王繼岌降

唐之伐蜀也亦命高季興充招討使季
興常欲取三峽畏峽路招討使張武威
名至是乘唐兵勢自將水軍上峽取施

州張武以鐵鑠斷江路李興遣勇士乘舟斫之會風大起舟絙於鎖不能進退矢石交下壞其戰艦李興輕舟遁去既而聞北路陷敗夔忠萬三州遣使詣魏王降

同光三年李紹琛入利州修桔柏津梁魏王繼岌至劔州

蜀武信節度使王宗壽以遂合渝瀘昌

五州降

李紹琛至綿州浮馬渡江入鹿頭關進至漢州

紹琛進至綿州倉庫民居已為蜀兵所燔又斷綿江浮梁無舟楫可渡紹琛謂李嚴曰吾懸軍深入利在速戰乘蜀人破膽之時但得百騎過鹿頭關彼且迎降不暇若俟修繕橋梁必留數日或教

王衍堅閉近關折吾兵勢儻延旬浹則
勝負未可知矣乃與嚴乘馬浮渡江從
兵得濟者僅千人溺死者六千餘人遂
入鹿頭關進據漢州

王宗弼遣使勞軍且輸降款

魏王繼岌郭崇韜李紹琛李嚴等至成都
蜀主王衍出降

自出師至克蜀凡七十日王宗弼王承

休伏誅莊宗聞破蜀遣宦官向延嗣還
上蜀簿得兵三十萬馬九千五百疋兵
器七百萬糧二百五十三萬石錢一百
九十二萬緡金銀二十二兩珠玉犀象
二萬文綿綾羅五十萬疋莊宗曰人言
蜀天下之富國也所得止於此耶延嗣
因言蜀之寶貨皆入崇韜家

王建自光啓三年丁未入閬州至唐同

蜀鑑卷第七
光三年乙酉蜀滅凡三十九年

蜀鑑卷第七



